

**IN ACHTO  
 TAJCUILOLAMATZIN TEN  
 QUINIJCUILOHUILIJ IN  
 TATITANIL SAN JUAN PARA IN  
 TANELTOCANI DE NOCHI  
 SENMANAHUAC**

*In Tajtoltzin ten quitemaca nemilis*

<sup>1</sup> Namechtajcuilohuilá de Yejuatzin ten technextilico de aconi Totajtzin Dios, huan Yejuatzin yejua in Cristo ten ipa yetinemía achtapa que nochi hualtzinehuac. Pero Yejuatzin nican talticpac ticacque huan ticyequitztoyaj ica toixtololo-huan. Huan ticyequitilijque huan ticmatocacque ya ica tomahuan. Yejuatzin Cristo in Tajtoltzin ten quitemaca ne yec nemilis.

<sup>2</sup> Porín ne inemilistzin de Cristo monextitzinoco nican talticpac huan tejuan tiquitacque huan tictetapohuijque de nojón chipahuac nemilistzin de Cristo. Huan no tamechmatiltíaj namejuan de nijín chipahuac nemilistzin ten amo queman tamis. Ne nemilistzin de Cristo yetinemí ihuan Totajtzin Dios huan techmonextilijtzinoco ya nican talticpac.

<sup>3</sup> Huan tamechtapohuij nochi de Cristo ten tiquitacque huan tamechtapohuij nochi de Cristo ten ticacque ya para que ijcón no namejuan xisepanpohuican tohuanme, ijcón queme tejuan yec melau tisepanpohuij ihuan Totajtzin Dios

huan tisepanpohuij ihuan in Jesucristo Yejuatzin Iconetzin Dios.

<sup>4</sup> Huan ijcón nochí nijín tamechtajcuilohuiláj para que ma ijcón cachí oc momajxitijtiu namoyolpaquilis.

### *Dios Yejuatzin in tanextzin*

<sup>5</sup> Huan yejua nijín in tanojnotzalis ten Jesucristo techmachtij huan tamechmatiltía tejuan que to Dios Yejuatzin yec melau chipactzin tanextzin huan iixpantzinco Yejuatzin amo teyi ongac tajtacol queme yesquía tayohuayanilot.

<sup>6</sup> Huan como tejuan tiquijtoaj que tisepanpohuij ihuan Yejuatzin huan tinemij oc tech in tajtacol den tayohuayanilot, ijcuacón sayó tixolopijtitinemij san huan amo teyi ticchihuaj ten melau.

<sup>7</sup> Pero como tejuan tinemij ica in chipactzin tanextzin de Dios ijcón queme Yejuatzin yetinemi tech ne chipactzin tanextzin, ijcuacón melau tisepanpohuij ya se huan ocsé, huan iesyotzin de Jesucristo Iconetzin Dios, yejua ne techchipautinemij de nochí totajtacol.

<sup>8</sup> Pero como tejuan tiquijtoaj que amo ticpíaj tajtacol, ijcuacón timocajcayahuaj tejuan san, huan amo teyi ongac ten melau tech toyolijtic.

<sup>9</sup> Huan Yejuatzin Yolmelahuactzin huan ipa quichihuas tenica moyectencahuac. Ica ya nojón como timoteluiláj ica ne totajtacoluan ihuan Dios, ijcuacón Yejuatzin techtapojpoluis den totajtacoluan huan techchipautinemis de nochí pitzotic ten ticpíaj.

<sup>10</sup> Huan como tejuan tiquijtoaj que amo timota-jtacolmacacque ya, ijcuacón ticchihuaj que Yejuztin queme yesquía tacajcayauque, huan ijcón amo ticselíaj ne yec Tajtolzin de Dios tech toyolijtic.

## 2

### *Cristo totetajtohuijcatzin*

<sup>1</sup> Noconetzitzin, yejua nijín ten namechijcuilo-huilía tech nijín amatzin para que ma amo ximota-jtacolmacakan. Pero tacán acsá motajtacolmaca, ijcuacón xicmatican que ticpíaj se naquen Toteta-jtohuijcau nepa iixpantzincó Totajtzin Dios, huan Yejuztin ne in Jesucristo in Yolmelahuactzin.

<sup>2</sup> Huan in Cristo technequixtiltico ica in miquilis den totajtacoluan. Huan amo sayó de tejuan totajtacoluan. Ta, no Cristo quixtahuac in tajtacol den nochí in talticpacuani.

<sup>3</sup> Huan tacán tiquntacamatinemij in tanahuatilme de Dios, ijcuacón ticmatocque que tejuan ticajsicaixmatque ya Dios.

<sup>4</sup> Huan tacán acsá quiptoia ijcuín: “Nejua niquixmatoc ya Dios”, huan yejua ne amo quintacamatinemi in tanahuatilme de Dios, ijcuacón yejua ne sayó xolopijti san, huan amo teyi ongac ten melau tech iyolijtic.

<sup>5</sup> Huan naquen quitacamatinemi ten Dios qui-monequiltía, yejua ne hueyi melau que quiajsicatasoja Dios ca nochí niyolo. Huan cuac titatacamatinemij ihuan Dios, ijcuacón cuali ticmatocque ya que tipohuij ihuan Yejuztin.

**6** Huan como acsá quijtoa que yejua pohui huan quitacamatinemi Dios, ijcuacón monequi ma yejua ma chipaucanemi ijcón queme Cristo chipaucanemic nican talticpac.

*In yancuic tanahuatil*

**7** Nocnihuan, amo namechijcuilohuilía se yan-cuic tanahuatil. Ta, namechijcuilohuilía de ne tanahuatil ten ipa achtopa ya nanquipiayaj ya cuac namejuan nanquineltocatihuajque. Huan ne tanahuatil yejua in mismo Tajtoltzin de Dios ten achtopa nanquicacque.

**8** Huan axcan namechtajcuilohuilía ica nijín tanahuatil de tetasojtalis, queme yesquía yan-cuic tanahuatil. Huan ne tetasojtalis ipa yec mochiutoc itech Cristo; huan no axcan mochiutoc namotech. Huan in tajtacol den tayohuayanilot panotoc ya huan in yec melau tanextzin de Dios techtahuiliitoc ya.

**9** Huan como acsame quiptoaj que yejuan yetinemij tech in tanextzin de Dios huan no quitahuelitzinemij ninicniu, yejuan nojonques yetinemij oc tech in tajtacol den tayohuayanilot.

**10** Pero como acsame quitasojtatinemij ninicniu, yejuan nojonques nemij ya ica in tanextzin de Dios, huan amo quintojtopehuaj ocsequin tech in tajtacol oc.

**11** Huan como acsame quitahuelitzinemij oc ninicniu, yejuan nojonques pohuij oc tech in tajtacol, huan no yetinemij oc tech ne tajtacolne-milis den tayohuayanilot. Huan yejuan amo no quimatij can yohue porín in tajtacol den tayohuayanilot quinixpojpoyocuiltitoc.

**12** Namejuan noconetzitzin, namechtajcuilo-huilía porín Dios namechtaopojpoluij ya de namotajtacoluan, ica in chicahualis den tocaytzin de Cristo.

**13** Huan namejuan tetatme, namechtajcuilo-huilía porín nancajsicaixmatque ya in Cristo ten ipa achtopa yetinemía ya desde cuac nochí hualtzinehuac. Huan namejuan, telpocame, no namechtajcuilo-huilía porín nanquitanilijque ya in amocuali Satanás. Huan namejuan, coneme, no namechtajcuilo-huilía porín nancajsicaixmatque ya in Totajtzin Dios.

**14** Huan namejuan tetatme, no namechtajcuilo-huilía porín nancajsicaixmatque ya in Cristo ten ipa achtopa yetinemía ya desde cuac ne tzinpehuac nochí. Namejuan, telpocame, no namechtajcuilo-huilía porín no nanyolmajsitocque ya huan nanquiselijque ya in Tajtoltzin de Dios tech namoyolijtic huan no nanquitanilijque ya in amocuali Satanás.

**15** Huan no namechilía ijcuín: Amo xictasojtacan in tajtacolnemilis de nican talticpac nión teyi ten ehua itech ne tajtacolnemilis. Porín como nanquitasojtaj ne tajtacolnemilis de nican talticpac, ijcuacón amo nanquitasojtaj in Totajtzin Dios.

**16** Amo teyi ongac tajtacolnemilis ten hualehua de Totajtzin Dios. Ta, sayó hualehua itech ne amocuali Satanas. Huan in tajtacolnemilis tech-mactilisnequi nochí nijín: yejua ne tanejnequilis den pitzotic ten ehua itech in tonacayo; huan yejua ne taixnejnequilis cuac quiyocolitaj in toxitololohuan; huan yejua ne mohueyinequilis ten

ehua itech míac tataman de se quipixtoc. Nochi nijín hualehua itech ne tajtacolnemilis.

**17** Huan nochi in tajtacolnemilis tantiu ya ihuan nochi nijín tanejnequilis de pitzotic ten itech po-hui. Pero ne naquen quichiutinemi ten qui-monequiltía Dios, yejua ne nachipa yetotiu iix-tenojtzinco Totajtzin Dios.

*In tajtolme ten yec melau huan in tajtolme ten xolopijyot san*

**18** Noconetzitzin, axcan tantiyohue ya in tonalme. Huan namejuan nanquicacque ya que hualasque acsame ten quixnamiquisque in Cristo Jesús. Huan axcan namechyequilía que monextijque ya miacque ten quixnamictinemij in Cristo. Ica ya nojón cuali ticmatocque ya que tantiyohue ya in tonalme.

**19** Huan ne ten quixnamictinemij in Cristo, yejuan nojonques tohuan pohuíaj que taneltocani, pero quisque huan mosecocauque de tejuan ten titaneltocanij porín amo yec melau tohuan pohuíaj. Tajcón ne taixnamiquini ma yec pohuinij tohuanme, ijcuacón yejuan de yec melau ijcón quisentocasquíaj tohuanme. Pero yejuan quisque huan mosecocauque de tejuan den titaneltocani. Huan ijcón mochihuac para ma yec mota que yejuan amo queman yec poutinemíaj tohuanme.

**20** Huan in Cristo namechtayocolij ya in Yecticatzin Espíritu de Dios itech namoyolijtic. Ica ya nojón namejuan nanquimatiij nochi in tamachilis de Dios.

**21** Huan axcan namechtajcuilohuilía porín nanquimatiij ya in melahuac Tajtoltzin de Dios. Amo

namechtajcuilohuilá porín amo nanquipíaj in melahuac Tajtoltzin de Dios. Ta, cuali nanquimatiј ya que amo teyi ongac tacajcayahualis ten itech ehua in yec melahuac Tajtoltzin de Dios.

<sup>22</sup> Huan, ¿aconi yejua ne tecajcayaucatagat? Yejua ne se tecajcayaucatagat ten quijtoa que Jesús amo Yejuatzin in Cristo Temaquixtijque. Yejua ne tacajcayaucatagat ten quixnamiquí in Cristo huan no quisenmajpehua in Totajtzin Dios huan no quisenmajpehua Jesucristo, Yejuatzin Iconetzin Dios.

<sup>23</sup> Huan nochí neques ten quimajpehuaj Iconetzin Dios, yejuan nojonques amo no pohuij ihuan Totajtzin Dios. Huan nochí neques ten quiyequijtoaj que in Cristo Yejuatzin Iconetzin Dios, yejuan nojonques yec poutinemij ihuan Totajtzin Dios.

<sup>24</sup> Ica ya nojón xicyecpiacan tech namoyolijtic in melahuac Tajtoltzin de Dios, huan xictacamatiyacan nochí nijín tajtolme ten nanquicacque ya desde ne queman ya cuac yequinica namechtapohuijque. Huan como mocahua tech namoyolijtic nochí nijín tajtolme, ijcuacón namejuan cuali nanopoutinemij ihuan in Cristo de Iconetzin Dios, huan ijcón no nanopoutinemij ihuan Totajtzin Dios.

<sup>25</sup> Huan Jesucristo techyequilijtehuac nijín tajtol de que Yejuatzin moyectencahuac ya de techaxcatilis in yec nemilis ten amo queman tamis.

<sup>26</sup> Huan namechijcuilohuilá nochí nijín tajtolme huan ijcón namechmatiltía para que xiquixmatican neques ten quinequisque namechcaycayahuasque.

<sup>27</sup> Huan namejuan nanquipíaj ya tech namoyolijtic in Yecticatzin Espíritu ten namechaxcatilij

ya Jesucristo. Ica ya nojón amo monequi aca ma namechmachtis oc de Yecticatzin Espíritu, porín in Yecticatzin namechmachtía nochi tensá tataman. Huan Yejuatzin namechmachtía nochi ten melahuac huan amo tecajcayahua. Ica ya nojón xicsentocacan xictacamatinemican nochi ten namechmachtía in Yecticatzin Espíritu.

<sup>28</sup> Huan axcan, nopiluantzitzin, xictacamatinemican huan ximajsitinemican ihuan in Cristo para que ijcón nanquipiasque ne yolchicahualis cuac Yejuatzin monextijtzinoquiú nican talticpac. Huan para ma amo namopinautisque queman ocsepa mohualuicas Yejuatzin in Jesucristo.

<sup>29</sup> Huan nanquimatocque ya que in Jesucristo Yolmelahuactzin. Huan no ximatocan que nochi neques ten quichiutinemij ten Dios quimonequiltía, yejuan nojonques teconehuan de Dios.

### 3

#### *Teconehuan de Dios*

<sup>1</sup> Xiquitacan san de queniu tel techtasojta in Totajtzin Dios. Ica ya nojón Yejuatzin techtocaytía tiiconehuan de Dios. Huan melau tejuan tiiconehuan de Dios. Ica ya nojón in talticpactaca ten amo taneltocaj, yejuan nojonques amo techixmatij que tejuan tiiconehuan de Dios porín amo no quixmatij Totajtzin Dios.

<sup>2</sup> Notasojicnihuan, axcan ya tiiconehuan de Dios, huan ayamo monextía quenín tiyesque. Pero

ticmatocque ya que cuac Cristo monextijtzinoquiu, ijcuacón tejuan titamatisque queme Yejuatzin tamati porín tiquitasque in Cristo queme Yejuatzin cualnesi.

<sup>3</sup> Huan nochí ne tanel tocáni ten quiyecchíaj que no cuañesisque queme Cristo, yejuan nojonques mochipautiyohue ninnemilis ijcón queme Jesucristo chipactzin.

<sup>4</sup> Huan nochí neques ten quichiutinemij in tajtacol, yejuan nojonques Dios quintechtíia que elihuiscataca. Huan cuac se elihuistitinemi, ijcuacón se motajtacolmaca.

<sup>5</sup> Huan nanquimatoque ya que in Cristo monextijzinoco nican talticpac para techajchihuilis totajtacoluan. Huan no nanquimatoque ya que amo teyi ongac tajtacol itech Yejuatzin.

<sup>6</sup> Ijcón nochí ne tanel tocáni ten quitacamatinemij huan majsitinemij ihuan Cristo, yejuan nojonques amo quichiutinemij oc in tajtacol. Pero nochí neques ten motajtacolmacatinemij, yejuan nojonques amo queman quitilijque itanextililisuan de Cristo nión no quixmatque in Cristo Temaquixtijque.

<sup>7</sup> Noconetzitzin, ma amo aca namechcacyjahua. Porín neques ten quichiutinemij ten Dios quimonequiltía, yejuan ne yec yolmelauque ya ijcón queme Yejuatzin Yolmelahuactzin.

<sup>8</sup> Huan nochí neques ten quichiutinemij in tajtacol, yejuan nojonques pohuij oc ihuan in amocuali Satanás. Porín in amocuali, yejua ne ipa tajtacole desde cuac ayamo hualtzinehuac in talticpac. Ica ya nojón monextijzinoco in Teconetzin de Dios para quinuejuelos in chicahualisme den amocuali

Satanás.

<sup>9</sup> Huan amo aca quichiutinemij in tajtacol como yancuicayolij de Dios, porín ne iijyoyo de Dios yec yetoc ya itech ninyolijtic. Huan yejuan amo huelij oc quichiutinemisque tajtacol porín yan-cuicayolque ya de Dios.

<sup>10</sup> Huan moixmatij neques den melau iconet-zitzin de Dios ijcuín: nochí neques ten pohuij ihuan Dios, yejuan nojonques quitacamatinemij ten Dios quimonequiltía huan quintasojtatinemij nintasojcnihuan. Huan no moixmatij ne den iconehuan den amocuali Satanás porín yejuan nojónques amo ijcón quichiutinemij.

### *Ma timosepantasojtacan se huan ocsé*

<sup>11</sup> Huan yejua nijín in tanojnotzalis ten achtopa ya namechcaquiltijca de que ma timosenpantaso-jtacan se huan ocsé.

<sup>12</sup> Huan ma amo xicchihuacan queme ne tagat Caín quichihuac. Yejua pohuiaya ihuan in amocuali Satanás; ica ya nojón quimictij iicniu. Huan, ¿queyé ne Caín quimictij iicniu? Pues ne Caín quimictij iicniu porín ne Caín quichiutinemic chihualisme ten pitzotic, huan porín ne iicniu quichihuaya ten yec melahuac.

<sup>13</sup> Nocnihuan, amo xicmucaitacan cuac in talticpactaca namechtahuelitasque.

<sup>14</sup> Porín tejuan ticmatocque ya que tiquisque ya den chicahualis den miquilis huan tipanocque ya para tiyecyetosque ya itech ne nachipa nemilis. Huan cuali ticmatij que ijcón mochihuac porín tiquintasojtaj in tocnihuan. Huan nochí neques ten amo quitasojtaj ninicniu, yejuan nojonques

nejnentocque oc huan tzijtzicautocque oc tech in chicahualis den miquilis.

<sup>15</sup> Huan nochí neques ten quitahuelitaj ninicniu, yejuan nojonques temictiani ya. Huan ijcón namejuan cuali nanquimamatocque ya que in temictiani amo huelis quipiasque tech ninyolijtic ne nemilis ten amo queman tamis.

<sup>16</sup> Huan tiquixmatque toni quijtosnequi in tetasojtalís ijcuín: Yejuatzin Cristo quitemacac nine milis huan Yejuatzin momiquilij toixpatca. Huan no ijcón tejuan monequi ma tictemacasque tone milis para que ijcón tiquinpalehuijtinemisque in tocnihuan.

<sup>17</sup> Huan sequin tocnihuan quipíaj míac tenica motequipanosque nican talticpac. Huan tacán yejuan quitasque se tocniu ten amo teyi quipíá, huan como amo quipalehuíaj, yejuan nojonques amo quipiasque tech ninyolijtic ne tetasojtalís de Dios como amo teyi ica quipalehuíaj.

<sup>18</sup> Noconetzitzin, ma amo titetasojtacan sayó ica totajtoluan san nión sayó ica ten tiquijtoaj ica tonenepil. Ta, de yec melau ma titetasojtacan ica nochí ten ticchiutinemij.

*Ma ticpiacan ne yolchicahualis iixpantzinc  
Dios*

<sup>19</sup> Huan como ticpíaj ne tetasojtalís, ijcuacón cuali ticmatocque ya de que tipohuij ihuan ne yec melahuac Tajtoltzin de Dios. Huan ne tetasojtalís yejua ne techyolsehuis ya iixpantzinc Dios, como toyolo amo techteluilía ica tensá tajtacol.

<sup>20</sup> Porín Totajtzin Dios ojcachi oc hueyi huan que ne teluililis den toyolo porín Yejuatzin nochí quimati ten ticchiutinemij.

<sup>21</sup> Huan ijcón, notasojicnihuan, como toyolo amo techteluilía ica tensá tajtacol, pues ijcón ticipíaj ne yolsehuilis iixpantzincó Dios.

<sup>22</sup> Huan como toyolo amo techteluilía oc ica tensá tajtacol, ijcuacón Yejuatzin techmactilis nochí ten tictajtanisque, porín tiquintacamatinemij nintanahuatilan huan porín ticchiutinemij nochí ten Yejuatzin quimonequiltía.

<sup>23</sup> Huan ne tanahuatil de Dios yejuan nijín: Ma titacuautamatican ihuan ne tocaytzin den Iconetzin Dios, huan nijín Yejuatzin in Jesucristo. Huan no ma timosepantasojtacan se huan ocsé ijcón queme Yejuatzin technahuatilij ya.

<sup>24</sup> Huan nochí neques ten quitacamatinemij in tanahuatil de Dios, yejuan nojonques majsitinemij ya ihuan Yejuatzin huan Dios no inuan majsitinemi. Huan ticmatocque ya que Yejuatzin yetica tech toyolijtic porín Yejuatzin techtayocolij ya in Yecticatzin Espíritu.

## 4

*In Yecticatzin Espíritu huan in amocuali ejecame  
ten quixnamiquij Cristo*

<sup>1</sup> Notasojicnihuan, amo xiquinneltoquilican nochí ne tamachtiani ten quijtoaj que yejuan quipíaj in chicahualis de Dios. Ta, achto xiquinyectemolican nintamachilisuan de que cox melau quipíaj in chicahualis de Dios oso amo. Porín miacque tamachtiani tacajcayahuani

nentinemij nican talticpac huan yejuan quijtoaj que no tajtoaj itencopa Totajtzin Dios.

<sup>2</sup> Huan cuali huelis nanquinixmatisque neques tamachtiani ten quipíaj in Yecticatzin Espíritu tech ninyolijtic. Nochi neques ten quiyecquijtoaj que in Jesucristo monacayotijtzinoco nican talticpac queme yec melau tagat, yejuan nojonques quipíaj in chicahualis de Dios.

<sup>3</sup> Huan nochí ne tamachtiani ten amo quiyecquijtoaj que Jesucristo monacayotijtzinoco nican talticpac, yejuan nojonques amo quipíaj in Yecticatzin Espíritu. Ta, yejuan quipíaj tech ninyolijtic ne amocuali ejecame ten quixnamiquij in Cristo. Namejuan nanquicacque ya que hualasque sequi amocuali ejecame taixnamiquini de Cristo; huan melau axcan nentocque ya nican.

<sup>4</sup> Nocone huan, namejuan nanopohuij ya ihuan Totajtzin Dios. Ica ya nojón nanquintanilijque ya ne tamachtiani tacajcayahuani, porín Totajtzin Dios yetica tech namoyolijtic huan Yejuatzin cachí chicahuac huan ne amocuali ejecame amo quipíaj chicahualis.

<sup>5</sup> Huan yejuan ne tacajcayahuani tamachtiani pohuij nican talticpac. Ica ya nojón yejuan tajtoaj de tajtacolnemilis de nican talticpac huan in talticpacuani quincaquilíaj.

<sup>6</sup> Pero tejuan tipohuij ihuan Dios. Ica ya nojón nochí neques ten quixmatij Totajtzin Dios, yejuan nojonques no techcaquilíaj. Huan nochí neques ten amo pohuij ihuan Dios, yejuan nojonques amo techcaquilíaj. Huan ijcon cuali tiquixmatocque ya aconi quipíaj in chicahualis ten melau huan aconi quipíaj in chicahualis den amocuali ejecame ten

sayó tecajcayahuaj.

*Totajtzin Dios Yejuatzin ne tetasojtalism*

<sup>7</sup> Notasojicnihuan, monequi ma timosepantaso-jtacan se huan ocsé porín ne tetasojtalism hualeutoc de Totajtzin Dios. Nochi neques ten tetasoj-tatinemij, yejuan nojonques tanextijtinemij que yancuicayolque ya de Dios huan tanextijtinemij que quixmatocque ya Totajtzin Dios.

<sup>8</sup> Huan nochi neques ten amo tetasojtatinemij, yejuan nojonques tanextijtinemij que amo quix-matque Totajtzin Dios, porín to Dios Yejuatzin tetasojtatinemi.

<sup>9</sup> Huan Dios technextilij ya ne itetasojtalism ijcuíñ: Dios techualtitlanilij ya ne iyojtzin Conet-zin nican talticpac para ma tejuan ticpiacan ne nachipa nemilis ica ne chicahualis de Cristo.

<sup>10</sup> In tetasojtalism de Dios monextijtinemij ijcuíñ, que amo tejuan achtopa tictasojtacque Totajtzin Dios. Ta, achto Yejuatzin techtasojtac tejuan. Huan Yejuatzin techualtitlanilij Niconetzin yo-jtzin para ma Yejuatzin technequixtiltiqui ca in miquilis den totajtacoluan.

<sup>11</sup> Notasojicnihuan, como Dios ijcón techtasoj-tac, ijcuacon monequi tejuan no ma timosepanta-sojtacan se huan ocsé.

<sup>12</sup> Amo queman acsame quitacque Totajtzin Dios. Pero como tejuan timosenpantasojtaj se huan ocsé, ijcuacon Totajtzin Dios yecyetoc ya tech toyolijtic. Huan no ne tetasojtalism de Dios momajxitijtiu huan momoyautiu tech toyolijtic.

<sup>13</sup> Huan Totajtzin Dios techtayocolij ya in Yecti-catzin Espíritu. Ica ya nojón ticmatocque ya que

tipohuij ihuan Cristo huan no ticmatocque que in Cristo pohui tohuan.

<sup>14</sup> Huan tejuan tiquitacque ya in Cristo huan tamechmatiltáj que in Totajtzin Dios cualtitanic Niconetzin para ma Yejuatzin quinmaquixtiqui in talticpacuani.

<sup>15</sup> Huan nochí neques ten quiyecquijtoaj que Jesús Yejuatzin Niconetzin Dios, pues yejuan nojonques pohuij ya ihuan Dios huan itech ninyolitic yecyetica Totajtzin Dios.

<sup>16</sup> Ica ya nojón tejuan ticajsicamatque ya huan titacuautamatque ya de que Dios techtasojta. Huan Totajtzin Dios tetasojta. Huan nochí neques ten nentinemij ica ne tetasojtalís, yejuan nojonques no majsitinemij ihuan Dios huan Dios no ninuan majsitinemi.

<sup>17</sup> Huan ijcón momajxititiu ne tetasojtalís para ma amo teyi ticpolocan tech toyolijtic. Huan ijcón ticpiasque ne yolchicahualis cuac techajsis ne tonal den hueyi tatzacuítulis. Huan tejuan monequi ma tinemican nican talticpac ica ne tetasojtalís de Dios, ijcón queme Cristo chipaucanemic ica tetasojtalís.

<sup>18</sup> Porín campa ongac tetasotalis, ompa amo ongac teyi moucayot. Huan ne tetasojtalís ten momajxitij ya, yejua ne quicalantamota ne moucayot. Huan in moucayot cuica in tajyohuilis itech yejua san. Ica ya nojón nochí neques ten quipíaj moucayot, yejuan nojonques yec melau ayamo teyecajsicatasojtaj.

<sup>19</sup> Tejuan tictasojtaj Dios porín Yejuatzin achto techtasojtac.

<sup>20</sup> Huan como acsá quijtoa ijcuín: “Nejua nictasojta Dios”, huan yejua no quintahuelita oc niicnihuan taneltocani, ijcuacón yejua ne sayó xolopijti san. Huan como tejuan amo tiquinyectasojtaj in tocnihuan taneltocani ten tiquinyequitztocque ya, pues ijcón tejuan amo no huelis tictasojtasque Totajtzin Dios porín Yejuatzin amo huelis tiquitztinemij.

<sup>21</sup> Yejuatzin techmacac itanahuatil ijcuín: Nochi neques ten quitasojtaj Dios, yejuan nojonques no monequi ma quintasojtacan ninicnihuan.

## 5

### *Tejuán tictanilisque in tajtacolnemilis*

<sup>1</sup> Huan nochí neques ten tacuautamatinemij de que Jesús Yejuatzin in Cristo Temaquixtijque, yejuan nojonques yancuicayolque ya de Dios. Huan nochí neques ten quitasojtaj Totajtzin Dios ne Teiscaltijcatzin, yejuan nojónques no quintasojtaj nochí itaneltocacahuán nochí ten Dios quincaltij huan ten quinyancuicayolitij ya.

<sup>2</sup> Huan cuac tictasojtaj Dios huan ticchiutinemij ten Dios technahuatilía, ijcuacón ticyecmatocque ya que no tiquintasojtaj ne den niconéhuan Dios.

<sup>3</sup> Huan nestinemi que melau ticpíaj ne tetasojtalís de Dios, cuac no tictacamatiј ya in tanahuatil ten Dios technahuatilía ma ticchiutinemican. Huan in tanahuatilme de Dios amo techmachilitiј que cox semi ohui para se quintacamatinemis.

<sup>4</sup> Pero nochí neques ten yancuicayolque ya de Dios, yejuan nojonques quitanilijtiyohue ya ne tajtacolnemilis de nican talticpac. Huan ijcón ica

totacuautamatilis tictaniliyohue ya ne tajtacol-nemilis.

<sup>5</sup> Huan nochí neques ten yec tacuautamatine-mij que Jesucristo Yejuatzin ne Niconetzin Dios, yejuan nojonques quitaniliyohue ya ne tajtacol-nemilis de nican talticpac.

*Techmatiltía de aconi Iconetzin Dios*

<sup>6</sup> Yejuatzin Jesucristo huala monextijtzinoco nican talticpac huan moahuij ica at; huan no quiteamacac niesyotzin cuac momiquili tech in cruztzin. Huan Jesucristo amo huala sayó para moahuis san. Ta, no para quimimilos niesyotzin tech in cruztzin. Huan in Yecticatzin Espíritu techajsicamatiltía nijín ten mochihuac ya. Porín in Yecticatzin Espíritu tajtoa sayó ica ten melau.

<sup>7</sup> Ne eluiyactzinco yetocque eyi ten techajsicamatiltíaj: In Totajtzin Dios, huan Niconetzin Dios yejua in Tajtoltzin, huan in Yecticatzin Espíritu; huan nijín eyi mosenijtoaj sansé san.

<sup>8</sup> Huan nican talticpac no yetocque eyin ten techajsicamatiltíaj: in Yecticatzin Espíritu, huan in atzin, huan in esti; huan nijín eyin mosenijtoaj sansé san.

<sup>9</sup> Huan amo ticneltocaj ne ten techajsicamatiltíaj den taca san. Pero ne ten Dios techajsicamatiltía, yejua ne semi cachi hueyi, porín Dios techilía sayó ne ten Yejuatzin quitac ya. Huan Totajtzin Dios techmatiltía de ne Niconetzin.

<sup>10</sup> Huan nochí neques ten yec tacuautamatine-mij ihuan Niconetzin Dios, yejuan nojonques quipíaj ya tech ninyolijtic in Tajtoltzin tenica Dios quinajsicamatiltía. Huan nochí neques ten amo yec tacuautamatij ihuan Dios, yejuan nojonques

quichihuaj que in Yejuatzin queme yesquía se tacajcayaque san. Porín yejuan amo quineltocaj ne ten Totajtzin Dios quitetajtohuiltij huan techili-jtoc de Niconetzin.

<sup>11</sup> Huan yejua nijín in Tajtoltzin ten Dios techajsicamatiltía: Dios techtayocolij ya in yec nemilis ten amo queman tamis huan ne nemilis hualeutoc de Cristo den Niconetzin Dios.

<sup>12</sup> Huan nochí neques ten moaxcatilíaj Niconetzin Dios tech ninyolijtic, yejuan nojonques moaxcatilíaj ne yec nemilis nachipa. Huan nochí neques ten amo moaxcatilíaj Niconetzin Dios tech ninyolijtic, yejuan nojonques amo no moaxcatilíaj ne yec nemilis ten amo queman tamis.

### *Tanemililisme tenica tamis nijín tajcuilolamatzin*

<sup>13</sup> Nochi nijín namechijcuilohuilá namejuan ten nantacuautamatij ihuan Niconetzin Dios para ijcón xicyecmatican que nanquipíaj ya in yec nemilis ten amo queman tamis, porín nantacuautamatinemij ica ne chicahualis den nitocaytzin de Cristo.

<sup>14</sup> Huan no ticpíaj ya se hueyi yoltacuautamitis ihuan Dios porín ticmatij ya que como tictajtanilíaj Dios tensá ijcón queme yejua in itanejnequilis de Yejuatzin, ijcuacón Totajtzin Dios techcaquilía.

<sup>15</sup> Huan como ticyecmatocque ya que Dios techcaquilis den tonetatautilis, ijcuacón no ijcón ticyecmatocque ya de que Dios techtayocolis nochí ten tictajtanilisque.

<sup>16</sup> Huan tacán namejuan nanquitaj se namocniu de que motajtacolmacatoc ica ne tajtacol ten

amo ica se ixpolihuis, ijcuacón monequi ma xictatautilican inahuactzin Yejuatzin huan ijcón Dios quimactilis oc ne tocniu in nemilis de nican talticpac como amo quichihuac ya se tajtacol tenica se ixpolihuis. Pero ongac tajtacol ten melau ica se ixpolihuis, huan ne taman tajtacol amo namechyoltanemililtía ma xictatautilcan Dios para ma Yejuatzin quitapojpolui.

<sup>17</sup> Huan nochí in amocuali chicahualisme nochí yejuan cualcuij tajtacol; pero ongac tajtacol ten amo ica se ixpolihuis.

<sup>18</sup> Ticyecmatocque ya que nochí neques ten yancuicayolque ya de Dios, yejuan nojonques amo motajtacolmacatinemij oc, porín Cristo in Teconetzin de Dios quinyecpixtoc ya; huan in amocuali Satanás amo teyi hueli ica quincojcocoa.

<sup>19</sup> Tejuan ticyecmatocque ya que tipohuij ihuan Dios, pero nochí in talticpacuani quinyecana oc yejua in amocuali Satanás.

<sup>20</sup> Huan ticyecmatocque ya que huala ya Niconetzin Dios, huan Cristo techajsicamatiltico ya huan techixmatiltico ya de Totajtzin Dios, Yejuatzin in Yolmelahuactzin. Huan tipoutocque ya ihuan in yec melau Dios; huan no tipoutocque ya ihuan Jesucristo de Niconetzin Yejuatzin Dios. Cristo in yec melau Dios huan no quipixtinemi ne yecnemilis ten amo queman tamis.

<sup>21</sup> Noconetzitzin, cuali ximotachilican den ne tatadiosme tamachiuchime. Ma ijcón mochihua. Amén.

**In cuij tajtoltzin de Dios  
New Testament in Nahuatl, Highland Puebla  
(MX:azz:Nahuatl, Highland Puebla)**

copyright © 1975 Wycliffe Bible Translators, Inc.

Language: Nahuatl, Highland Puebla

Translation by: Wycliffe Bible Translators, Inc.

Náhuatl, Sierra de Puebla [azz], Mexico

**Copyright Information**

© 1975, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Highland Puebla

**© 1975, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
60e701b6-39f2-5a69-8623-b68184ddc7b4